

# DAILYBHAJAN

## Hanuman Chalisa Lyrics in Hindi

**दोहा :** श्रीगुरु चरन सरोज रज, निज मनु मुकुरु सुधारि।बरनऊं रघुबर बिमल जसु, जो दायकु फल चारि।। बुद्धिहीन तनु जानिके, सुमिरौं पवन-कुमार।बल बुद्धि बिद्या देहु मोहिं, हरहु कलेस बिकार।।

जय हनुमान ज्ञान गुन सागर ।  
जय कपीस तिहुँ लोक उजागर ॥१॥

राम दूत अतुलित बल धामा ।  
अञ्जनि-पुत्र पवनसुत नामा ॥२॥

महाबीर बिक्रम बजरङ्गी ।  
कुमति निवार सुमति के सङ्गी ॥३॥

कञ्चन बरन बिराज सुबेसा ।  
कानन कुण्डल कुञ्चित केसा ॥४॥  
हाथ बज्र औ ध्वजा बिराजै ।  
काँधे मूँज जनेउ साजै ॥५॥

सङ्कर सुवन केसरीनन्दन ।  
तेज प्रताप महा जग बन्दन ॥६॥

बिद्यावान गुनी अति चातुर ।  
राम काज करिबे को आतुर ॥७॥

प्रभु चरित्र सुनिबे को रसिया ।  
राम लखन सीता मन बसिया ॥८॥

सूक्ष्म रूप धरि सियहिं दिखावा ।  
बिकट रूप धरि लङ्क जरावा ॥९॥

भीम रूप धरि असुर सँहारे ।  
रामचन्द्र के काज सँवारे ॥१०॥

लाय सञ्जीवन लखन जियाये ।  
श्रीरघुबीर हरषि उर लाये ॥११॥

रघुपति कीह्नी बहुत बड़ाई ।  
तुम मम प्रिय भरतहि सम भाई ॥१२॥

सहस्र बदन तुम्हारे जस गावैं ।  
अस कहि श्रीपति कण्ठ लगावैं ॥१३॥

सनकादिक ब्रह्मादि मुनीसा ।  
नारद सारद सहित अहीसा ॥१४॥

जम कुबेर दिगपाल जहाँ ते ।  
कबि कोबिद कहि सके कहाँ ते ॥१५॥

तुम उपकार सुग्रीवहिं कीहा ।  
राम मिलाय राज पद दीहा ॥१६॥

तुम्हरो मन्त्र बिभीषन माना ।  
लङ्केस्वर भए सब जग जाना ॥१७॥

जुग सहस्र जोजन पर भानु ।  
लील्यो ताहि मधुर फल जानू ॥१८॥

प्रभु मुद्रिका मेलि मुख माहीं ।  
जलधि लाँघि गये अचरज नाहीं ॥१९॥

दुर्गम काज जगत के जेते ।  
सुगम अनुग्रह तुम्हरे तेते ॥२०॥

राम दुआरे तुम रखवारे ।  
होत न आज्ञा बिनु पैसारे ॥२१॥

सब सुख लहै तुम्हारी सरना ।  
तुम रच्छक काहू को डर ना ॥२२॥

आपन तेज सहारो आपै ।  
तीनों लोक हाँक तें काँपै ॥२३॥

भूत पिशाच निकट नहीं आवै ।  
महाबीर जब नाम सुनावै ॥२४॥

नासै रोग हरै सब पीरा ।  
जपत निरन्तर हनुमत बीरा ॥२५॥

सङ्कट तें हनुमान छुड़ावै ।  
मन क्रम बचन ध्यान जो लावै ॥२६॥

सब पर राम तपस्वी राजा ।  
तिन के काज सकल तुम साजा ॥२७॥

और मनोरथ जो कोई लावै ।  
सोई अमित जीवन फल पावै ॥२८॥

चारों जुग परताप तुह्यारा ।  
है परसिद्ध जगत उजियारा ॥२९॥

साधु सन्त के तुम रखवारे ।  
असुर निकन्दन राम दुलारे ॥३०॥

अष्टसिद्धि नौ निधि के दाता ।  
अस बर दीन जानकी माता ॥३१॥

राम रसायन तुह्यरे पासा ।  
सदा रहो रघुपति के दासा ॥३२॥

तुह्यरे भजन राम को पावै ।  
जनम जनम के दुख बिसरावै ॥३३॥

अन्त काल रघुबर पुर जाई ।  
जहाँ जन्म हरिभक्त कहाई ॥३४॥

और देवता चित्त न धरई ।  
हनुमत सेइ सर्ब सुख करई ॥३५॥

सङ्कट कटै मिटै सब पीरा ।  
जो सुमिरै हनुमत बलबीरा ॥३६॥

जय जय जय हनुमान गोसाईं ।  
कृपा करहु गुरुदेव की नाई ॥३७॥

जो सत बार पाठ कर कोई ।  
छूटहि बन्दि महा सुख होई ॥३८॥

जो यह पढ़ै हनुमान चालीसा ।  
होय सिद्धि साखी गौरीसा ॥३९॥

तुलसीदास सदा हरि चेरा ।  
कीजै नाथ हृदय महँ डेरा ॥४०॥

**दोहा :**पवन तनय संकट हरन, मंगल मूरति रूप।राम लखन सीता सहित, हृदय बसहु सुर भूप॥